

四庫全書

史部

欽定四庫全書

欽定續通志卷二十六

宋紀二

太宗

太宗皇帝諱炁初名匡義改賜光義宣祖第三子太祖同母弟也帝幼不羣及長隆準龍顏望之知為大人工文業多藝能仕周至供奉官都知太祖自陳橋兵次為軍士推戴帝與趙普之謀為多太祖即位以帝為殿前

都虞候領睦州防禦使尋領泰寧軍節度使加同平章
事行開封尹再加兼中書令封晉王開寶九年冬十月
癸丑太祖崩帝遂即皇帝位乙卯大赦常赦所不原者
咸除之庚申以弟廷美為開封尹兼中書令封齊王太
祖子德昭為永興軍節度使兼侍中封武功郡王德芳
為山南西道節度使興元尹同平章事薛居正加左僕
射沈倫加右僕射盧多遜為中書侍郎曹彬仍樞密使
並同平章事楚昭輔為樞密使潘美為宣徽南院使內

外官進秩有差十一月甲子追冊尹氏為淑德皇后越國夫人符氏為懿德皇后庚午詔諸州大索知天文術數人送闕下匿者論死乙亥以權知高麗國事王佖為高麗國王癸未如相國寺己丑遣著作郎馮正佐郎張玘告哀於遼十二月甲寅大赦改是歲為太平興國元年

按洪邁容齋續筆云嗣君紹統必踰年乃改元唐宣宗以叔繼姪亦終會昌六年而改大中獨我太宗以太祖開寶九年之十二月二十二日改為太平興國元年去新歲纔八日耳意當時必有其說計嶺蜀之遠制書到時已是二年之春是時宰相失於不考故實致行之弗審使人君即位而無元年尤為不可也我

皇上御製全韻詩云即位急改元已失厚道大彼洪邁身為宋臣故托於求其說而不得者而其寔太宗之慚德已莫揜於千命太祖子及齊王廷美子並稱皇子戊午遼載之下矣使來聘已未如講武池遂如玉津園

二年春正月壬戌以大行在殯不視朝丙子如相國寺還御東華門觀燈辛卯如講武池置江南榷茶場二月甲午遼使來賀即位及正旦庚子帝改名炁壬寅大宴崇德殿不作樂乙巳如新鑿池遂如講武池宴射玉津園己酉禁江南諸州鹽先通商處戊午如太平興國寺

遂如造船務還至建隆觀三月己卯以河陽節度使趙
普為太子少保己丑禁江南諸州銅許遼互市夏四月
丁酉遼使來會葬乙卯葬太祖皇帝於永昌陵五月遣
辛仲甫使於遼秋七月庚午詔諸庫藏敢變權衡以取
羨餘者死閏月甲寅詔發潭州兵擊梅山洞賊丁巳令
支郡得專奏事八月乙丑平海軍節度使陳洪進來朝
九月乙未如弓箭院遂如新修三館壬寅如新水磴遂
如西御園宴射辛亥如講武臺大閱容州初貢珠丙辰

狩于近郊丁巳吳越王上表乞呼名不允冬十月辛酉
遼使來賀乾明節丙子詔禁天文卜相等書私習者斬
辛巳畋於近郊初榷酤十一月丁亥朔日有食之既甲
午遣李瀆等使於遼賀正旦

三年春正月甲午浚汾河庚子罷陳州蔡河舟算辛丑
浚廣濟惠民及蔡河治黃河隄乙巳浚汴口三月乙酉
貝州清河民田祚十世同居旌其門閭復其家辛丑監
海門戍殿直武裕坐姦賊棄市壬寅泰州戎酋王泥猪

寇八狼戾巡檢劉崇讓擊敗之己酉吳越國王錢俶來
朝壬子如開寶寺夏四月己卯陳洪進獻漳泉二州凡
得縣十四庚辰如城南觀麥遂至玉津園宴射辛巳侍
御史趙承嗣坐隱官錢棄市癸未以陳洪進為武寧軍
節度使同平章事錢俶乞罷所封吳越國王及解天下
兵馬大元帥并寢書詔不名之命求歸國不許五月己酉
赦漳泉二州仍給復一年錢俶獻其兩浙諸州凡得州
十三軍一縣八十六丁亥封錢俶為淮海國王其子惟

濬徙淮南軍節度使惟治徙鎮國軍節度使戊子赦兩
浙給復如漳泉癸巳遣李從吉等使於遼壬寅定難軍
節度使李克勣卒乙巳以其子繼筠為定難軍節度使
六月戊午復給乘驛銀牌壬午秦州清水監軍田仁朗
擊西羌敗之癸未詔太平興國元年十月乙卯以來諸
職官以贓致罪者會赦不叙永為定制秋七月壬辰右
千牛衛上將軍李煜卒追封吳王戊戌金鄉縣民李光
襲十世同居詔旌其門壬子中書令史李知古坐受賕

擅改刑部所定法杖殺之八月癸丑如南造船務遂至
玉津園宴射丙辰詔兩浙發淮海王總麻以上親及管
內官吏赴闕癸酉詹事丞徐選坐贓杖殺之冬十月癸
丑遼使來賀乾明節辛酉復兗州曲阜縣襲封文宣公
家庚午畋於近郊十一月丙申合祀天地於園丘大赦
羣臣上尊號曰應運統天聖明文武皇帝丙午以郊祀
加恩中外十二月乙丑如講武臺觀機石連弩庚午畋
於近郊戊寅遼使來賀正旦

四年春正月丁亥命太子中允張洎著作佐郎句中正
使高麗告以伐漢遣官分督諸州軍儲輸太原行營庚
寅以宣徽南院使潘美為北路都招討制置使分命河
陽節度使崔彥進彰德軍節度使李漢瓊彰信軍節度
使劉遇桂州觀察使曹翰侍衛馬軍都虞候米信步軍
都虞候田重進並為行營指揮使辛卯命雲州觀察使
郭進為太原石嶺關都部署以斷燕薊援師癸巳置簽
署樞密院事以石熙載為之癸卯新渾儀成二月壬子

如國子監遂至玉津園宴射甲寅以齊王廷美子德恭
為貴州防禦使丙辰以中書侍郎尚書右僕射同平章
事沈倫為東京留守兼判開封府事宣徽北院使王仁
贍為大內都部署樞密承旨陳從言副之甲子帝發京
師戊寅次澶州觀魚於河三月庚辰次鎮州丁亥郭進
破北漢西龍門砦乙未郭進大破遼援兵於關南乙巳
夏州李繼筠乞帥所部助討北漢詔泉州送陳洪進親
屬赴闕夏四月己酉嵐州行營與北漢兵戰破之庚戌

孟縣降以石熙載為樞密副使辛酉以孟玄喆劉廷翰
為兵馬都鈐轄崔翰總馬步軍並駐泊鎮州壬戌帝發
鎮州折御卿克岢嵐軍乙丑克隆州己巳折御卿克嵐
州庚午次太原駐蹕汾東行營辛未詔諭北漢主劉繼
元使降壬申夜帝如城西督諸將攻城五月癸未繼元
遣使納款甲申繼元降北漢平凡得州十縣四十以祠
部郎中劉保勛知太原府己丑以繼元為右衛上將軍
彭城郡公乙未送劉繼元總麻以上親赴闕庚子發太

原丁未次鎮州六月甲寅以將伐幽薊發京東河北諸
州軍儲赴北面行營庚申帝復自將伐遼丁卯次東易
州刺史劉宇以城降戊辰次涿州判官劉厚德以城降
庚午次幽州城南駐蹕寶光寺遼軍於城北帝率衆擊
走之壬申命定國軍節度使宋渥等四面分兵攻幽州
以潘美知幽州行府事遼鐵林廂主李札盧存以所部
來降癸酉幽州神武廳直并鄉兵四百人來降乙亥范
陽民以牛酒犒師秋七月庚辰遼建雄軍節度使知順

州劉廷素來降壬午知薊州劉守恩來降癸未帝督諸軍及遼師大戰於高梁河敗績甲申班師乙巳帝至自范陽八月壬子西京留守石守信坐從征失律貶從信軍節度使甲寅彰信軍節度使劉遇貶宿州觀察使癸亥命潘美屯河東三交口甲戌武功郡王德昭自殺丙午鎮州都鈐轄劉廷翰及遼師戰於遂城西敗之冬十月乙亥論平北漢功進封齊王廷美為秦王薛居正加司空沈倫加左僕射盧多遜兼兵部尚書曹彬兼侍中

白進超崔翰劉廷翰田重進米信並領諸軍節度使楚
昭輔崔彥進李漢瓊並加檢校太尉潘美加檢校太師
王仁贍加檢校太傅石熙載加刑部侍郎文武從臣進
秩有差十一月己丑畋於近郊辛卯忻州奏與遼師戰
破之十二月丁卯畋於近郊

五年春正月庚辰詔宣慰河東諸州三月己丑左監門
衛上將軍劉鋹卒追封南越王癸巳宣徽南院使潘美
敗遼師於鴈門閏月丙午如水磴因觀魚庚午如講武

池觀習樓船秋七月丁未以蘭州團練使孫全興等為
部署出邕州廉州以討交州九月癸卯交州黎桓遣使
為丁璿上表求襲位壬戌敗於近郊冬十月戊寅大發
兵屯關南及鎮定州十一月庚子安南靜海軍節度行
軍司馬權知州事丁璿上表求襲位不報丙午下詔征
遼以秦王廷美為東京留守王仁贍為大內都部署陳
從信副之壬子駕發京師癸丑以河陽三城節度使崔
彥進為關南都部署戊午駐蹕大名府諸軍及遼師戰

於莫州敗績十二月戊寅以保靜軍節度使劉遇威塞
軍節度使曹翰為幽州東西路部署庚辰發大名府因
校獵乙酉帝至自大名府交州行營與賊戰大破之

六年春三月己酉興元尹德芳薨壬戌孫全興等破賊
於白藤江口知邕州侯仁貴死之詔斬部署劉澄賈湜
於軍中徵孫全興下獄遂班師夏四月罷湖州織羅放
女工五月己未降死罪流以下原之平塞軍與遼師戰
破之六月甲戌司空平章事薛居正薨秋九月乙未朔

日有食之辛亥以趙普為司徒石熙載為樞密使壬子
詔求直言冬十月甲申以侍衛馬軍都指揮使米信為
定州都部署十一月丁酉監察御史張白坐知蔡州日
假官錢糴糶棄市辛亥祀天地於圜丘大赦羣臣上尊
號曰應運統天睿文英武大聖至明廣孝皇帝丁巳交
州行營部署孫全興棄市辛酉以樞密使楚昭輔為左
驍衛上將軍十二月己卯畋於近郊辛卯禁民私市近
界部落馬

七年春正月壬戌定輿服等差及婚取喪葬儀二月乙酉免廬州管内逋租三月癸巳朔日有食之乙未以秦王廷美為西京留守夏四月甲子以樞密直學士竇偁中書舍人郭贇並叅知政事如京使柴禹錫為宣徽北院使兼樞密副使戊辰中書侍郎平章事盧多遜罷為兵部尚書丁丑西京留守秦王廷美罷歸第流盧多遜於崖州庚辰左僕射平章事沈倫罷為工部尚書五月辛丑崔彥進敗遼師於唐興戊申慮囚已酉夏州留後

李繼捧獻其銀夏綏宥四州辛亥潘美敗遼師於鴈門
丙辰降封秦王廷美為涪陵縣公安置房州以崇化副
使閻彥進知房州監察御史袁廓通判軍州事己未府
州破遼師於新澤砦六月乙亥遣使發李繼捧總麻已
上親赴闕其弟繼遷奔地斤澤秋七月甲午以子德崇
為檢校太保同平章事封衛王德明為檢校太保同平
章事封廣平王乙卯沈倫以左僕射致仕八月庚申太
子太師王溥薨冬十月戊辰如金明池觀習水戰己卯

左諫議大夫叅知政事竇偁卒癸卯乾元厯成十一月
己酉以李繼捧為彰德軍節度使禁民喪葬作樂十二
月戊午朔日有食之庚午蠲兩浙諸州太平興國六年
以前逋租戊寅高麗國王佀卒其弟治遣使求襲位詔
以治為高麗國王閏月戊子豐州與契丹戰破之丙申
畋於近郊辛亥詔赦銀夏等州常赦所不原者

八年春正月己卯以東上閤門使王顯為宣徽南院使
酒坊使弭德超為北院使並兼樞密副使二月戊子朔

日有食之丁酉禁內屬部落私市女口三月庚申以右
諫議大夫宋琪為叅知政事豐州奏破契丹降三千餘
帳癸酉如金明池觀習水戰甲申除福建諸州鹽禁夏
四月壬寅班外官戒諭辭壬子流樞密副使弭德超於
瓊州五月丁卯黎桓自稱交州三使留後遣使來貢并
上丁璿讓表詔送璿母子赴闕不聽丁亥流威塞軍節
度使曹翰於登州六月己亥以王顯為樞密使柴禹錫
為宣徽南院使兼樞密副使己酉兗州泰山父老及瑕

丘等七縣民詣闕請封禪秋七月辛未叅知政事郭贄
罷為祕書少監庚辰加宋琪刑部尚書以工部尚書李
昉叅知政事八月壬辰以大水釋死罪以下庚戌以樞
密使石熙載為右僕射辛亥增諡法冬十月戊戌衛王
德崇改名元佐廣平王德明改元祐德昌改元休德嚴
改元儁德和改元傑巳酉進封元佐為楚王元佑陳王
元休韓王元儁冀王元傑益王並檢校太保同平章
事司徒兼侍中趙普罷為武勝軍節度使十一月壬子

以叅知政事宋琪李昉並平章事癸丑除川峽民祖父
母父母在別籍異財棄市律壬申以翰林學士李穆呂
蒙正李至並叅知政事樞密直學士張齊賢王沔並同
簽署樞密院事十二月壬午詔綏銀夏等州民界外歸
業者給復三年

雍熙元年春正月戊午右僕射石熙載薨壬戌購逸書
丁卯涪陵縣公廷美薨追封涪陵王癸酉左諫議大夫
叅知政事李穆卒夏四月乙酉泰山父老詣闕請封禪

戊子羣臣表請凡三上許之甲午如金明池觀習水戰
遂至講武臺觀射五月庚戌除江南鹽禁辛亥如城南
觀刈麥六月丁亥詔求直言己丑遣使按兩浙淮南西
川廣南嶽訟鎮安軍節度使守中書令石守信薨壬寅
詔罷封泰山冬十月夏州言掩擊李繼遷獲其母妻俘
千四百餘帳繼遷走壬辰禁布帛不中度者十一月丁
巳祀天地於圜丘大赦改元十二月庚辰徙淮海國王
錢俶為漢南國王丁亥罷嶺南採珠場壬辰立德妃李

氏為皇后

二年春正月丙辰以德恭為左武衛大將軍判濟州封
定安侯德隆為右武衛大將軍判沂州封長靈侯右補
闕劉蒙叟通判濟州起居舍人韓儉通判沂州二月戊
寅權交州留後黎桓遣使來貢乙未李繼遷誘殺汝州
團練使曹光實夏四月乙亥遣使振江南諸州及察官
吏能否戊寅遣忠武軍節度使潘美復屯三交口己丑
殿前承旨王著坐贓棄市辛丑夏州行營破西蕃息利

族五月甲子如城南觀麥戊子復禁鹽榷酤秋八月癸酉遣使按兩浙荆湖福建江南東西路淮南諸州獄仍察官吏勤惰九月丙午除十惡官吏犯贓謀故劫殺外降死罪流以下原之蠲江浙諸州民逋租辛亥廢楚王元佐為庶人已巳禁海賈冬十月辛丑慮囚十一月壬午狩於近郊以所獲獻太廟著為令辛卯詔在官丁父母憂者並放離任十二月庚子朔日有食之丙辰門下侍郎平章事宋琪罷

三年春正月辛未右武衛大將軍長寧侯德隆薨以其弟德彝嗣侯仍知沂州庚寅北伐以天平軍節度使曹彬為幽州道行營前軍馬步水陸都部署河陽三城節度使崔彥進副之侍衛馬軍都指揮使彰化軍節度使朱信為西北道都部署沙州觀察使杜彥圭副之以其衆出雄州侍衛步軍都指揮使靜難軍節度使田重進為定州路都部署出飛狐戍戍叅知政事李至罷為禮部侍郎二月壬子以檢校太師忠武軍節度使潘美為

雲應朔等州都部署雲州觀察使楊業副之出鴈門三月癸酉曹彬克固安丁丑田重進戰契丹於飛狐北破之潘美下寰州辛巳曹彬克涿州潘美圍朔州降之癸未田重進又敗契丹於飛狐北乙酉曹彬又敗之於涿州南丁亥潘美克應州庚寅武寧軍節度使同平章事岐國公陳洪進卒辛卯田重進攻飛狐其守將呂行德等舉城降丙申進圍靈丘其守將穆超以城降夏四月辛丑潘美克雲州田重進戰於飛狐北大破契丹壬寅

曹彬米信戰於新城東北又破之己酉田重進再戰飛
狐北再破之乙卯重進至蔚州其牙校李存璋許彥欽
執其監城使同州節度使耿紹忠以城降五月庚午曹
彬之師大敗於岐溝關退屯易州知幽州行府事劉保
勲死之丙子召曹彬崔彥進米信歸闕命田重進屯定
州潘美還代州徙雲應寰朔吏民及吐渾部族分置河
東京西遼復陷寰州楊業死之六月戊戌朔日有食之
甲辰以御史中丞辛仲甫為叅知政事秋七月庚午貶

曹彬為右驍衛上將軍崔彥進為右武衛上將軍米信
為右屯衛上將軍杜彥圭為均州團練使甲午詔陳王
元佑改名元僖韓王元休改元侃箕王元儁改元份八
月丁酉以王沔張宏並為樞密副使丁未振劔州饑辛
亥降潘美為檢校太保九月丙寅減兩京諸州繫囚罪
賜所徙竄應蔚等州民米蠲昇宣等十四州雍熙二年
官所振貸戊寅賜北征軍士陣亡者家三月糧冬十月
甲辰以陳王元僖為開封尹庚申詔以權靜海軍留後

黎桓為本軍節度使十一月丙戌如建隆觀相國寺祈
雪十二月己亥田重進攻岐溝關下之壬寅契丹敗劉
廷讓軍於君子館先鋒將賀令圖被執高陽關部署楊
重進死之壬子建房州為保康軍以右衛上將軍劉繼
元為節度使代州副部署盧漢賈敗契丹於土鐙堡
四年春正月己卯遣使按西川嶺南江浙等路刑獄丙
戌詔應行營將士戰敗潰散者並釋不問蠲河北雍熙
三年以前逋租敵所蹂踐者給復三年軍所過二年餘

一年二月丙申以漢南國王錢俶為武勝軍節度使徙封南陽國王丁酉繕治河北諸州軍城隍甲寅錢俶改封許王夏四月癸巳以御史中丞趙昌言為右諫議大夫樞密副使丁未如金明池觀水嬉遂習射瓊林苑五月丙寅遣使市諸道民馬六月丁酉以右驍衛上將軍劉廷讓為雄州都部署庚子定國軍節度使崔翰復為高陽關兵馬都部署秋七月丙寅如講武池觀魚冬十月丙午流雄州都部署劉廷讓於商州士子左僕射致

仕沈倫薨十一月庚辰詔以實數給百官奉十二月庚戌改於近郊

端拱元年春正月乙亥大赦改元癸未如玉津園習射二月丙申禁諸州獻珍禽奇獸巳亥詔瀛州民為敵所侵暴者賜三年租復其役五年庚子開封尹陳王元僖進封許王元侃襄王元份越王錢俶鄧王中書門下平章事李昉為尚書右僕射叅知政事呂蒙正同中書門下平章事樞密使王顯加檢校太傅給事中許國公趙

普守太保兼侍中樞密副使王沔為叅知政事御史中丞張宏為樞密副使庚戌以子元偓為左衛上將軍徐國公元偁為右衛上將軍涇國公三月甲戌貶樞密副使趙昌言為崇信軍行軍司馬癸未如玉津園習射夏五月辛未賜感德軍節度使李繼捧姓趙氏名保忠士申以保忠為定難軍節度使閏月辛卯以洺州防禦使劉福為高陽關兵馬都部署濮州防禦使楊贊為貝州兵馬都部署六月丙辰右領軍衛大將軍陳廷山謀反

伏誅秋七月丙午除西川諸州鹽禁辛亥以忠武軍節度使潘美知鎮州八月甲子以宣徽南院使郭守文為鎮州路都部署戊寅太師鄧王錢俶薨庚辰如太學遂至玉津園習射九月乙酉以侍衛馬軍都指揮使李繼隆為定州都部署冬十月壬午以侍衛步軍都指揮使戴興為澶州都部署癸未詔罷游獵放五坊所畜鷹犬十一月己丑郭守文破契丹於唐河十二月辛未以夏州蕃落使李繼遷為銀州刺史充洛苑使

二年春正月壬辰以涪州觀察使柴禹錫為澶州兵馬
部署癸巳詔議北伐二月壬子令河北東西路招置營
田三月詔平塞天威平定威虜靜戎保塞寧邊等軍祁
易保定鎮邢趙等州民除雍熙四年正月丙戌詔給復
外更給復二年霸代洺雄莫深等州平虜岢嵐軍更給
復一年癸亥作方田三月辛卯以高瓊為并代都部署
夏五月戊戌以旱慮因遣使決諸道獄秋七月甲申以
知代州張齊賢為刑部侍郎樞密副使鹽鐵使張遜為

宣徽北院使簽署樞密院事辛丑契丹犯威虜軍崇儀使尹繼倫擊敗之八月丙辰大赦冬十月辛未以定難軍節度使趙保忠同平章事帝以災異迭見下詔罪已十二月庚申令四方所上表牋稱皇帝去尊號

淳化元年春正月戊寅朔減京畿繫囚罪改元文武官並加勲階爵邑除逋負受尊號二月丁未除江南兩浙淮西嶺南諸州漁禁夏四月庚戌慮囚遣使分決諸道獄甲寅五溪蠻田漢權來附丙寅以殿前副都指揮使

戴興為鎮州都部署五月甲午給致仕官半奉六月丙午罷中元下元張燈秋七月賜開封陳留封邱酸棗鄆陵今年田租之半開封特給復一年八月乙巳毀左藏庫金銀器巳巳禁川峽嶺南湖南殺人祀鬼免京兆長安八縣今歲租十之六及舒州宿松等縣魚池稅九月免滄單汝三州今歲租十之六冬十月以乾鄭二州河南壽安等十四縣旱州蠲今歲租十之四縣蠲其稅十一月免大名府管内今歲租十之七

二年春正月丙子遣商州團練使翟守素帥師援趙保忠於夏州己丑詔陝西諸州長吏招誘流亡復業者貸其粟仍給復二年二月癸丑監察御史祖吉坐贓棄市乙丑斬夔州亂卒謝榮等百餘人於市閏月辛未朔日有食之丁亥詔內外諸軍除木槍弓弩矢外不得蓄他兵器夏四月庚午罷端州貢硯辛巳以張齊賢陳恕並叅知政事張遜兼樞密副使溫仲舒寇準並為樞密副使五月己亥詔減兩京諸州繫囚罪六月甲戌忠武軍

節度使同平章事潘美卒以張永德為并代都部署庚寅禁陝西緣邊諸州闌出生口秋七月己亥詔陝西緣邊諸州民鬻男女入近界部落者官贖之李繼遷奉表請降以為銀州觀察使賜國姓改名保吉九月丁酉戶部侍郎叅知政事王沔給事中叅知政事陳恕並罷守本官己亥中書侍郎平章事呂蒙正罷為吏部尚書以右僕射李昉叅知政事張齊賢並同平章事翰林學士賈黃中李沆並為給事中叅知政事癸卯樞密使王顯

罷為崇信軍節度使甲辰以張遜知樞密院事溫仲舒
寇準同知院事十一月乙巳罷京城內外力役土功十
二月癸未保康軍節度使劉繼元卒是歲女真表請伐
契丹不許自是女真遂屬于契丹

三年春二月乙丑朔日有食之三月乙未以趙普為太
師封魏國公戊午以高麗賓貢進士四十人並為祕書
省祕書郎遣還庚申如金明池觀水戲夏五月己酉以
旱遣使分決諸路獄六月戊寅慮囚庚寅以殿前都虞

侯王昭遠為井代兵馬都部署辛卯置常平倉秋七月
己酉趙普薨八月壬申召終南山隱士种放不至冬十
一月己亥許王元僖薨甲申慮囚趙保忠貢鵠號海東
青還之

四年春正月辛卯祀天地於圜丘大赦二月乙未朔日
有食之癸亥廢沿江榷貨八務乙丑加高麗國王王治
檢校太師靜海軍節度使黎桓封交趾郡王三月壬子
詔權停貢舉夏六月戊午詔中丞已下皆親臨鞠獄丙

寅吏部侍郎平章事張齊賢罷為尚書左丞壬申宣徽
北院使知樞密院事張遜貶右領軍衛將軍右諫議大
夫同知院事寇準罷守本官以涪州觀察使柴禹錫為
宣徽北院使知樞密院事樞密直學士呂端叅知政事
劉昌言同知樞密院事戊寅初復給事中封駁秋八月
丙辰朔日有食之冬十月庚午始分天下州縣為十道
辛未右僕射平章事李昉給事中叅知政事賈黃中李
沆左諫議大夫知樞密院事溫仲舒並罷守本官以吏

部尚書呂蒙正平章事翰林學士蘇易簡為給事中叅
知政事樞密都承旨趙鎔為宣徽北院使樞密直學士
向敏中為右諫議大夫並同知樞密院事丁丑以右諫
議大夫趙昌言為給事中叅知政事辛巳遣使按行畿
縣民田被水者蠲其租十二月戊申西川都巡檢使張
玘與王小波戰於江原死之小波死衆推其黨李順為
帥

五年春正月戊午李順陷漢州

宋史漢州作濮州
誤茲據東都事畧已未

陷彭州乙丑慮囚已巳李順陷成都振宋毫陳潁州饑
癸酉以侍衛馬軍都指揮使李繼隆為河西行營都部
署討李繼遷甲戌以昭宣使王繼恩為兩川招安使討
李順辛巳除兩京諸州淳化二年逋負二月乙未李順
攻劔州都監西京作坊副使上官正成都監軍供奉官
宿翰擊破之丙午如南御莊觀稼巳酉以益王元傑為
淮南鎮江等軍節度使徙封吳王辛亥詔除劔南東西
川峽路淳化五年以前逋負三月乙亥趙保忠為趙保

吉所襲奔還夏州指揮使趙光嗣執之以獻李繼隆帥師入夏州夏四月壬午除天下主吏逋負甲申削趙保吉所賜姓名辛卯慮囚戊戌降諸州死罪以下囚己亥王繼恩敗賊於綿州庚子復綿州內殿崇班曹習破賊於老溪復閬州綿州巡檢使胡正遠復巴州壬寅西川行營擊賊於研口砦破之復劍州五月丁巳王繼恩克成都擒李順其黨張餘復攻陷嘉戎瀘渝涪忠萬開八州開州監軍秦傳序死之丙寅河西行營送趙保忠至

闕下釋其罪授右千牛衛上將軍封宥罪侯己巳以少
府監雷有終為諫議大夫知成都府庚午賊攻夔州峽
路都大巡檢白繼贊夔州巡檢使解守顯敗之於西津
口壬申右僕射李昉以司空致仕甲戌復利州興元府
洋州西縣一歲丙子礫李順黨八人於鳳翔市六月戊
戌陝路行營破賊於廣安軍又破賊張罕於嘉陵江口
又破於合州西方溪戊申以待衛步軍都指揮使高瓊
為鎮州都部署賊攻陵州知州張旦擊破之秋七月辛

亥賊攻眉州乙亥李繼遷遣使來貢八月甲午置宣政

使以宦者昭宣使王繼恩為之

謹按通鑑輯覽

御批內侍領兵仍唐弊政其後童貫梁師成之擅權實由此開其端太宗雖不與宣徽之除而命之領兵已屬乖舛作法于涼不能辭貽謀不善之責矣 辛丑遣知益州張詠赴部得便宜從事

癸卯以叅知政事趙昌言為西川峽路招安馬步軍都部署尋詔昌言駐鳳翔遣內侍押班衛紹欽往行營指揮軍事峽路行營破賊帥張餘復雲安軍李繼遷使其弟奉表待罪九月庚戌戶部尚書辛仲甫以太子少保

致仕辛酉遣使分行宋毫陳潁泗壽鄧蔡等州按行民
田被水及種蒔不及者蠲其租壬申以襄王元侃為開
封尹改封壽王大赦乙亥以左諫議大夫寇準參知政
事戊寅衛紹欽破賊於學射山別將楊瓊復蜀州曹習
等又破賊於安國鎮冬十月庚辰西川行營指揮使張
嶙殺其將王文壽以叛其衆斬嶙首以降乙未楊瓊等
復邛州十一月庚戌遣使諭李繼遷賜以器幣茶藥衣

服
謹按通鑑輯覽

御批趙普前此輕信李繼捧縱其復歸夏州已為失策茲復輕信李繼遷受其偽降坐稽天討以留世世邊患蓋姑息偷安實為宋代之失而養癰貽害始謀不戒則自是後始之

十二月戊寅朔日當食雲

陰不見辛巳命樞密直學士張鑑西京作坊副使馮守規安撫西川庚寅宿翰等引兵趨嘉州偽知州王文操以城降乙未祕書丞張樞坐知榮州降賊棄市

至道元年春正月戊申朔改元降京畿囚罪蠲諸州逋租及陝西諸州去年秋稅之半癸亥契丹將韓德威誘党項勒浪嵬族自振武犯邊永安軍節度使折御卿擊

敗之戊辰以翰林學士錢若水為右諫議大夫同知樞
密院事樞密副使劉昌言罷為給事中甲戌李繼遷遣
使來貢二月戊戌以旱慮囚張餘伏誅蠲襄唐均汝隨
鄧歸峽等州去年逋租振亳州房州光化軍饑三月庚
申詔求直言辛酉以會州觀察使知清遠軍田紹斌為
靈州兵馬都部署夏四月癸未吏部尚書平章事呂蒙
正罷為右僕射以參知政事呂端為戶部侍郎平章事
宣徽北院使知樞密院事柴禹錫罷為鎮寧軍節度使

參知政事蘇易簡為禮部侍郎以翰林學士張洎為給事中參知政事甲申以宣徽北院使同知樞密院事趙鎔知樞密院事乙酉遼人犯雄州知州何承矩擊敗之壬寅慮囚六月乙酉購求圖書丙戌遣使諭李繼遷授鄜州節度使繼遷不奉詔秋七月丙寅除陳許等九州及光化軍今年夏稅八月壬辰詔立壽王元侃為皇太子改名恒兼判開封府大赦文武常參官子為父後見任官者賜勲一轉癸卯禁西北緣邊州民與內屬戎人

皆娶九月庚午清遠軍言李繼遷入寇冬十月乙丑陝西轉運使鄭文寶坐撓邊責授藍田縣令十一月以峯州團練使上官正右諫議大夫雷有終並為西川招安使召王繼恩歸闕十二月契丹犯邊折御卿率兵禦之卒於師斬馬步軍都軍頭孫贊於軍中庚辰新渾儀成二年春正月己亥祀天地於圜丘大赦二月壬申司空致仕李昉薨戊寅以越王元份為杭州大都督兼領越州吳王元傑為揚州大都督兼領壽州己卯以徐國公

元偓為洪州都督鎮南軍節度使涇國公元偓為鄂州
都督武清軍節度使庚辰以御史中丞李昌齡為給事
中叅知政事辛巳以呂蒙正為左僕射宋琪為右僕射
乙未定任子官制夏四月甲戌命侍衛馬軍都指揮使
李繼隆為環慶等州都部署殿前都虞候范廷召副之
討李繼遷五月癸卯李繼遷寇靈州六月戊戌黔州蠻
寇鹽井巡檢使王惟節死之秋七月己亥以殿前都指
揮使王超為夏綏麟府州都部署丙寅給事中叅知政

事寇準罷守本官戊辰蠲峽路諸州民去年逋租九月
戊寅右僕射宋琪薨詔川峽諸州民家先藏兵器者限
百日送官匿者斬已卯夏州延州行營破李繼遷於烏
白池繼遷遁甲申貶會州觀察使環慶副都部署田紹
斌為右監門衛率府副率安置虢州

三年春正月丙子以戶部侍郎溫仲舒禮部侍郎王化
基並參知政事給事中李惟清同知樞密院事叅知政
事張洎罷為刑部侍郎辛卯以待衛馬步軍都虞候傅

潛為延州路都部署殿前都虞候王昭遠為靈州路都
部署二月丙申靈州行營破李繼遷辛丑帝不豫甲辰
降京畿死罪因三月癸巳宣詔令皇太子柩前即位是
日皇帝崩年五十九諡曰神功聖德文武皇帝廟號太
宗陵曰永熙陵

太宗太平興國八年

其元年即太祖開寶九年

雍熙四年端拱

二年淳化五年至道三年凡二十二年

欽定續通志卷二十六

欽定四庫全書

欽定續通志卷二十七

宋紀三

真宗

真宗皇帝諱恒太宗第三子也母曰元德皇后李氏帝幼英睿與諸王嬉戲好作戰陣之狀自稱元帥太祖愛之育於宮中嘗登萬歲殿升御榻坐太祖撫之曰汝得作天子否對曰由天命耳比就學一覽成誦初名德昌

後改元休復改元侃歷封韓王襄王壽王加檢校太傅
開封尹至道元年立為皇太子改今名仍判府事故皇
太子次在宰相上宮僚稱臣帝皆推讓弗受見賓客李
至李沆必先拜迎送降階及門開封政務填委帝裁決
輕重靡不稱愜故京獄屢空三年三月癸巳太宗崩奉
遺制即皇帝位於柩前夏四月乙未尊皇后為皇太后
大赦常赦所不原者咸除之癸卯門下侍郎兼兵部尚
書平章事呂端加右僕射弟越王元份進封雍王吳王

元傑進充王並兼中書令徐國公元偃進封彭城郡王
涇國公元偁進安定郡王並同平章事元儼封曹國公
姪閬州觀察使惟吉為武信軍節度使侍衛馬步軍都
虞候傅潛殿前都指揮使王超侍衛馬軍都指揮使李
繼隆侍衛步軍都指揮使高瓊並領諸軍節度使駙馬
都尉王承衍石保吉魏咸信並為諸軍節度使甲辰宣
徽北院使知樞密院事趙鎔加南院使左丞李至禮部
侍郎李沆並參知政事丁未進中外官秩各一等五月

丁卯詔求直言甲戌戶部侍郎參知政事李昌齡責授
忠武行軍司馬甲申放宮人給事歲久者丙戌以鎮安
軍節度使李繼隆同平章事丁亥立秦國夫人郭氏為
皇后六月戊戌追復涪王廷美西京留守兼中書令秦
王贈兄魏王德昭太傅岐王德芳太保辛丑詔罷獻祥
瑞甲辰復封兄元佐為楚王乙巳追冊莒國夫人潘氏
為皇后秋七月乙丑詔轉運使更迭赴闕訪以民事癸
酉詔訪孔子嫡孫甲申以殿前都虞候范廷召為定州

駐泊都部署葛霸為鎮州駐泊都部署王漢忠為高陽
關行營都部署康保裔為并代州都部署八月丙申罷
鹽井役己亥以鎮海軍節度使曹彬為樞密使知樞密
院事趙鎔為壽州觀察使同知樞密院事李惟清為御
史中丞戶部侍郎向敏中給事中夏侯嶠並為樞密副
使庚申西川廣武卒劉旰逐巡檢使韓景祐掠蜀漢等
州招安使上官正鈐轄馬知節討平之九月戊寅以孔
子四十五世孫延世為曲阜縣令襲封文宣公冬十月

夏人寇靈州合河都部署楊瓊擊走之己酉葬太宗皇帝於永熙陵十一月丙寅降兩京死罪以下一等十二月丙申追尊母賢妃李氏為皇太后辛丑詔諸路轉運使申飭令長勸農甲辰以銀州觀察使趙保吉為定難軍節度使

咸平元年春正月辛酉改元二月甲午以星變詔求直言避殿減膳乙未慮囚三月辛巳以趙保吉歸順遣使諭陝西縱綏銀流民還鄉仍家給米一斛夏四月壬寅

趙保吉遣弟繼瑗入謝己酉遣使按天下吏民逋負悉除之五月戊午朔日有食之丙辰以旱免開封二十五州軍田租冬十月丙戌朔日有食之戊子呂端為太子太保戶部尚書張齊賢參知政事李沆並平章事李至為武勝軍節度使己丑參知政事溫仲舒罷為禮部尚書樞密副使夏侯嶠罷為戶部侍郎翰林侍讀學士以樞密副使向敏中為兵部侍郎參知政事翰林學士楊礪宋湜並為樞密副使

二年春二月丙申以趙普配享太祖廟庭詔羣臣迎養
父母蠲天下逋負釋繫囚三月丙辰振江浙饑壬申以
王漢忠為涇原邠寧靈環都部署閏月丁亥以久不雨
詔天下繫囚非十惡枉法及已殺人者死以下減一等
庚寅罷有司營繕之不急者詔中外直言極諫夏五月
丁亥嚴服用之制六月戊午曹彬薨秋七月甲申以傅
潛為鎮定高陽關行營都部署張昭允為鈐轄給外任
官職田己丑以橫海軍節度使王顯為樞密使八月乙

卯羣臣上尊號曰崇文廣武聖明仁孝皇帝九月庚辰朔日有食之癸卯如騏驎院鎮定都部署奏敗遼兵於廉良路冬十月壬子宜州執溪峒蠻酋三十餘人詣闕詔釋其罪遣還癸丑放澧州蠻界歸業民租戊午置福建路惠民倉十一月丙戌祀天地於圜丘錄功臣子孫之無祿者壬辰張齊賢加門下侍郎李沆加中書侍郎文武悉加恩有差乙未詔自將禦邊所次頓舍給用毋泛及州縣以周瑩為駕前軍都部署石保吉為行營先

鋒都部署己亥狩於近郊辛丑賜京城父老衣帛丙午以魏咸信為貝冀行營都部署己酉以李沆為東京留守十二月甲寅駕發京師戊午駐蹕澶州冀州奏敗契丹於城南壬戌至澶州登臨河亭賜父老錦袍茶帛甲子次大名府契丹攻威虜軍本軍擊敗之殺其酋帥府州軍入五合州拔黃太尉砦丁卯召見大名府父老勞賜之

三年春正月己卯朔駐蹕大名府詔并代都部署高瓊

等分屯冀州邢州癸未以葛霸為貝冀高陽關前軍行
營都部署契丹犯河間高陽關都部署康保裔死之乙
酉流忠武軍節度使傅潛於房州都鈐轄張昭允於通
州丁亥如紫極宮還登子城閱騎射高陽關貝冀路都
部署范廷召等敗契丹於莫州庚寅赦河北及淄齊州
非持杖劫盜謀故殺枉法賊十惡至死者並釋之錄將
吏死事者子孫民被焚掠者復其租罷緣邊二十三州
軍權酤甲午駕發大名府益州軍亂殺鈐轄符昭壽逐

知州牛冕等推都虞候王均為首以叛詔戶部使雷有終為瀘州觀察使帥師會李惠等討之庚子至自大名府二月癸亥以周瑩為宣徽南院使王繼英為北院使並知樞密院事王旦為給事中同知樞密院事乙丑以王顯為定州路行營都部署王超為鎮州路行營都部署丁卯雷有終等為王均所敗退保漢州李惠死之戊辰慮囚三月戊寅朔日有食之夏四月庚戌呂端薨甲寅閱河北防城舉人康克勤等擊射丁巳以葛霸為邠

寧環慶都部署壬申削前知益州牛冕西川轉運使張
適籍冕流儋州適為連州參軍五月丁卯降天下死罪
一等流以下釋之十惡至死謀故劫殺坐贓枉法者論
如律如玉津園觀刈麥己丑如金明池觀水嬉遂至瓊
林苑宴射六月丁卯以向敏中為河北河東宣撫使秋
七月己亥以翰林侍讀學士夏侯嶠侍講邢昺為江浙
巡撫使冬十月甲辰雷有終復益州壬子削綿漢都巡
檢澄州刺史張思鈞籍流封州己丑雷有終追斬王均

於富順監詔原川峽路繫囚死罪以下雷有終等進秩
有差十一月戊寅均畿內田稅壬午詔羣臣盡言無諱
常參官轉對如故事未預次對者聽封事以聞丙申張
齊賢罷為兵部尚書十二月戊申狩於近郊甲子契丹
稅木監使黃顥等率屬內附

四年春正月甲戌朔降天下繫囚甲申命樞密直學士
馮拯陳堯叟詳中外封事詔應益州軍民因城亂殺傷
劫盜除官吏外皆釋不問二月癸丑決天下獄三月甲

戌撫水州蠻酋蒙瑛等來納兵器毒藥箭誓不復犯邊
庚寅以左僕射呂蒙正兵部侍郎向敏中並平章事中
書侍郎平章事李沆加門下侍郎辛卯以參知政事王
化基為工部尚書同知樞密院事王旦為工部侍郎參
知政事樞密直學士馮拯陳堯叟並為右諫議大夫同
知樞密院事夏四月丙午以葛霸為并代行營都部署
壬子詔親老無兼侍者特與近任己未以王欽若為左
諫議大夫參知政事五月壬申降京畿繫囚罪六月癸

卯有司言減天下冗吏凡十九萬五千餘人丁巳減東川民田先為江水所害者租丁卯詔州縣學校及聚徒講誦之所並賜九經秋七月己卯邊將言契丹將入寇以王顯為鎮定高陽關三路都部署王超副之王漢忠為都排陣使八月辛丑以張齊賢為涇原等路安撫經畧使壬子如御龍營閱武藝遂觀稼北郊宴射於含芳園九月李繼遷陷清遠軍冬十月曹瑑以蕃兵邀李繼遷輜重於唐龍鎮己未張斌破契丹於長城口十一月壬申

知階州竇玘獻白鷹還之王顯奏破契丹庚寅畋於近郊十二月戊寅李繼遷部族訛遇等來歸壬午靈川河外砦主李瓊等叛降西夏乙酉李繼遷部族訛豬等率屬來附庚寅振河北饑仍蠲其賦役

五年春正月壬寅李繼遷部將卧浪己等內附壬戌環慶部署張凝擊諸蕃破之二月己丑以王漢忠為邠寧環慶路都部署三月丁酉李繼遷陷靈州知州裴濟死之夏四月壬申賜陝西民輓送緣邊芻糧者租之半壬

午命三司歲較戶口丙戌賜深霸九州民租有差癸巳
復雄州榷場五月壬寅知榮州褚德臻坐盜官銀棄市
乙巳蠲天下逋負丙午以王顯為河陽三城節度使六
月癸酉繼遷圍麟州曹璨請濟師詔發并代石隰州兵
援之乙亥以侍衛馬軍都虞候王超為定州路駐泊行
營都部署己卯以宣徽南院使知樞密院事周瑩為永
清軍節度使秋七月甲午朔日有食之壬戌契丹大林
砦使王昭敏等來降西羌寇洪德砦守將擊走之乙酉

石隰部署言河西蕃族拽浪南山等四百人來歸冬十月丁亥平章事向敏中罷為戶部侍郎十一月壬辰復麟州租一歲壬寅祀天地於圜丘大赦己酉封子玄祐為信國公庚戌呂蒙正加司空李沆加右僕射雍王元份守太傅充王元傑守太保曹國公元儼同平章事

六年春二月戊寅如飛山雄武營觀發機石連弩遂宴射潛龍園己卯以京東西淮南水災遣使振之庚辰以西涼府六谷首領播羅支為朔方軍節度靈州西面都

巡檢使甲申蕃部葉市族囉埋等內附三月辛卯朔交
州八州使黃慶集等來歸綏州東山蕃部軍使拽白等
來歸夏四月李繼遷寇洪德砦蕃官慶香乂勣慶等擊
走之遼寇望都副都部署王繼忠陷於敵發河東兵援
之五月癸丑削鎮州副都部署李福籍流封州六月丁
卯豐州瓦窰沒剌如羅昧克等族擊李繼遷敗之秋七
月癸丑兗王元傑薨八月辛未原渭等州西蕃八部二
十五族來歸丙子賜環慶秋田經寇踐傷及民被掠者

粟米蠲棣州民租十之三冬十一月癸巳慮囚降死罪
以下以苦寒令諸路休役兵已亥閱捧日軍士十二月
庚申遣使於西北勞賜將士甲子詔求直言李繼遷攻
西涼知府丁惟清沒焉庚午以李繼隆為山南東道節
度使戊寅降天下死罪流以下釋之

景德元年春正月丙戌朔大赦改元丁亥麟府路言遼
言涅族拔黃三百餘帳內屬辛丑詔民間天象器物識
候禁書並納所司匿不言者死石隰州言河西蕃部四

十五族內附二月西涼府潘羅支集六谷蕃部合擊李
繼遷敗之繼遷死羅支使來獻捷三月威虜軍守將破
契丹於長城口柳谷川蕃部入寇麟府擊敗之己亥皇
太后崩夏四月丙辰蠲澧州石門縣租二歲丁卯以隆
暑休北邊役兵五月甲申賜邢州民租之半六月洪德
砦言繼遷部將都尾等率屬歸附鎮戎軍言敗戎人於
石門川庚午洪德砦言蕃部羅泥天王本族諸首領各
率屬歸附趙保忠卒秋七月癸未班用兵誅賞格丙戌

李沆薨庚寅以翰林學士畢士安為吏部侍郎參知政事八月涇原部署擊萬子軍主族帳敗之己未以畢士安寇準並平章事宣徽南院使王繼英為樞密使同知樞密院事馮拯陳堯叟並簽署樞密院事丙子以保平軍節度石保吉為武寧軍節度同平章事九月癸未罷北面齋御劔內臣以劔屬主將丁酉召宰相議親征契丹閏月乙卯詔河北吏民殺契丹者所至援之仍頒賞格癸酉沙臺北平砦威虜軍合擊契丹破之乙亥以參知

政事王欽若判天雄軍府兼都部署契丹將達蘭攻威虜
順安軍三路都部署擊敗之又攻北平砦及保州復為
州砦兵所敗達蘭與契丹主及其母并衆攻定州丙子以
天雄軍都部署周瑩為駕前貝冀路都部署侍衛馬軍
都指揮使葛霸為駕前邢洺路都部署己卯高繼祖敗
契丹於岢嵐軍冬十月癸未麟府路以兵入朔州破大
狼水砦乙未詔王超等率兵赴行在丁酉詔魏能張凝
田敏屯定州癸卯以廝鐸督為朔方軍節度靈州西面

巡檢西涼府六谷大首領保莫州威虜哥嵐軍及北平
砦擊契丹皆敗之遼主遣使請和命閣門祗候曹利用
往答之丁未以雍王元份為東京留守十一月乙卯遼
人攻瀛州知府李延渥敗之己未又逼冀州知州王嶼
敗之甲子獵於近郊丙寅遣使安集河北流民戊辰以
山南東道節度同平章事李繼隆為駕前東面排陣使
武寧軍節度同平章事石保吉為駕前西面排陣使庚
午車駕北巡癸酉駐蹕韋城甲戌寒甚左右進貂帽毳

裘却之曰臣下皆苦寒朕安用此契丹兵至澶州北直犯前軍達蘭殪於陣丙子帝次澶州渡河如北砦御城北樓召諸將撫慰戊寅曹利用還十二月庚辰朔日有食之契丹使者來講和辛巳遣使安撫河北京東壬午如城南臨河亭癸未如北砦又幸李繼隆營詔諭兩京以將班師甲申契丹使來獻御衣食物乙酉御行營南樓觀河遂宴從官及契丹使丙戌遣使撫諭懷孟澤潞鄭滑等州放強壯歸農遣監西京左藏庫李繼昌使契丹定和議

戒諸將勿出兵邀其歸路丁亥遣使安集河北流民瘞
暴骸以閤門祗候曹利用為東上閤門使忠州刺史戊
子如北砦勞軍召李繼隆石保安宴射於行宮西亭壬
辰赦河北諸州死罪以下民經蹂踐者給復二年錄死
事者子孫癸巳以參知政事王旦權東京留守甲午車
駕發澶州乙未契丹使者以誓書來丁酉契丹兵出塞戊戌
至自澶州辛丑錄契丹誓書頒河北河東諸州癸卯遣使
撫問河北東西路官吏將卒訪察功狀甲辰改威虜諸

軍名戊申詔卹河北傷殘

二年春正月庚戌朔以與契丹講和大赦非故鬪殺放火強盜偽造符印犯職官典十惡至死者悉除之壬子放河北諸州強壯歸農仍市耕牛給之癸丑罷諸路行營合鎮定兩路都部署為一乙卯罷北面部署鈐轄都監使臣振河北饑遣使如清德軍收瘞戰沒遺骸致祭罷江淮荆浙增推酤錢甲子振淮南饑戊辰以天平軍節度使王超為崇信軍節度使省河北戍兵十之五緣邊

三之一所在量軍儲饋給勿調民飛輓二月癸未李繼隆卒甲午詔沿邊得契丹馬牛悉縱還之沒蕃漢口歸業者給資糧弛邊民鐵禁環州言羌人入寇擊走之癸卯遣太子中允孫僅等使於契丹三月庚申禁邊民入外境掠奪夏四月己亥葺河北城池癸卯以馮拯為參知政事甲辰以寧國軍留後吳元扆為武勝軍節度西羌寇環州擊敗之五月癸酉詔天下權利勿增羨為額六月丁丑詔勸學辛卯以趙德明歸款諭河西諸蕃各守疆

界秋七月甲子詔復賢良方正能直言極諫等六科八月戊寅雍王元份薨丙戌有司上新定權衡法九月丁未以向敏中為鄜延路都部署辛未命近臣慮開封府繫囚壬申詔荆湖溪峒民為蠻人所掠而歸者勿限年月給還舊產冬十月乙酉畢士安薨丙戌遣職方郎中韩國華等使於契丹十一月丁巳祀天地於圜丘大赦癸亥寇準加中書侍郎兼工部尚書進封彭城王元偓為寧王安定王元偁為舒王曹國公元儼進封廣陵王安

定公惟吉加同平章事癸酉契丹使來賀承天節十二月
癸未以高瓊為忠武軍節度使葛霸為昭德軍節度使
契丹使來賀明年正旦

二年春正月丁卯詔緣邊歸業民給復三年辛未置常
平倉二月甲申以宋州為應天府戊戌寇準罷為刑部
尚書以左丞參知政事王旦為工部尚書平章事己亥
以王欽若陳堯叟並知樞密院事翰林學士趙安仁參
知政事樞密都承旨韓崇訓馬知節並僉署樞密院事

三月辛亥免隨州光化民所貸糧夏四月丙子如開寶寺遂至御龍直班院觀教閱弓刀又如左驤院還至崇文院觀圖籍乙酉置河北緣邊安撫使副都監于雄州壬辰命使巡撫益利梓夔福建諸路決獄及犒設將吏父老己亥遣使巡撫江浙路五月壬寅日當食不虧渭州妙娥族三千餘帳內附六月丙申遣使振應天府水災及瘞溺死者秋七月壬寅減廊延戍兵庚戌以渭州鎮戎軍收獲蕃部牛給內地耕民九月乙丑放西州

納質人夏州趙德明奉表歸款冬十月庚午以趙德明
為定難軍節度兼侍中封西平王十二月乙酉狩於近
郊

四年春正月甲辰以陳堯叟為東京留守乙巳以丁謂
為隨駕三司使己未車駕發京師庚申次中牟縣除逋
負釋繫囚賜父老衣幣凡所過如之二月己巳如西京
遣使祭周六廟庚寅詔河南府置五代漢高祖廟辛卯
車駕發西京甲午次鄭州遣使祀中嶽及周嵩懿二陵

三月己亥至自西京癸丑趙德明遣使來謝廩給因貢
馳馬丁巳詔天下收瘞遺骸致祭夏四月辛巳皇后郭
氏崩五月丙申朔日有食之閏月戊辰減劔隴等三十
九州軍歲貢物夔賀等二十七州軍悉罷之秋七月甲
戌宜州軍校陳進殺知州劉永規等劫判官盧成均為
首詔閣門使曹利用等討之辛巳以黎龍廷為靜海軍
節度交趾郡王賜名至忠八月辛亥賜文宣王四十六
世孫聖祐同學究出身丁謂上景德會計錄九月壬申

賜畿縣聖惠方冬十月甲午朔日當食不見曹利用擒
盧成均於象州斬陳進乙巳考試進士新格甲寅詔宜
柳象州懷遠軍死罪以下非十惡謀故鬪殺官吏犯枉
法贓者並原之廣南東西路雜犯死罪以下遞減一等
脅從受署者勿理蠲宜柳象州懷遠軍丁錢及夏秋租
桂昭州秋租是歲大有年

大中祥符元年春正月乙丑天書見於左承天門帝及
羣臣拜迎於朝元殿丁卯紫雲見戊辰大赦改元文武

官加恩有差賜京師酺幽州旱求市麥種夏州饑請易粟並許之戊寅蠲畿內所貸糧己卯詔以天書之應申儆在位二月壬辰御乾元門觀酺賜父老千五百人衣服茶綵丁酉分遣中使錫邊臣宴三月甲戌兗州父老一千二百人詣闕請封禪丁卯兗州并諸路進士等八百四十人詣闕請封禪壬午文武官兵民蠻夷耆老僧道二萬四千三百七十餘人詣闕請封禪自是表凡五上夏四月甲午詔以十月有事於泰山遣官告天地宗

廟嶽瀆諸祠乙未以知樞密院事王欽若參知政事趙
安仁為泰山封禪經度制置使丙申以王旦為封禪大
禮使馮拯陳堯叟分掌禮儀使丙午作昭應宮曹濟州
廣濟軍耆老二千二百人詣闕請臨幸五月壬戌王欽
若言泰山醴泉出錫山蒼龍見丙子詔瘞汴蔡廣濟河
流尸暴骸仍致祭癸未置天書儀衛使副扶侍使都監夾
侍凡有大禮即命之甲申放後宮一百二十人六月乙
未天書再見於泰山醴泉北壬寅迎泰山天書於含芳

園五色雲見庚戌曲赦兗州囚罪辛亥羣臣上尊號曰
崇文廣武儀天尊道寶應章感聖明仁孝皇帝秋七月
丙寅罷諸州所貢物非土地所宜者八月己丑上太祖
太宗尊謚庚寅詔東封道路軍馬毋犯民稼開封府毋
治道役民乙巳黔州磨嵯洛浦蠻首領龔行滿等率族
二千三百人內附己酉王欽若獻芝草八千餘本九月
戊午令有司勿奏大辟案岳州進三脊茅庚申以向敏
中權東京留守甲子奉天書告太廟悉陳諸州所上芝

草嘉禾瑞木於仗內乙亥如潛龍園宴射己卯以馬知
節為行營都部署庚辰趙安仁獻五色金玉丹紫芝八
千七百餘本乙酉親習封禪儀於崇德殿冬十月庚寅
以巡幸置考制度使副凡巡幸則命之是夕五星順行
同色辛卯車駕發京師扶侍使奉天書先道戊戌許鄆
齊等州長吏赴泰山陪位辛丑駐蹕鄆州神光起昊天
玉冊上丁未法駕入乾符縣奉高宮戊申王欽若等獻
泰山芝草三萬八千餘本己酉五色雲起嶽頂辛亥享

昊天上帝於圜臺陳天書於左以太祖太宗配命羣臣
享五方帝諸神於山下傳呼萬歲振動山谷壬子禪社
首如封祀儀紫氣下覆黃光如星繞天書匣縱四方所
獻珍禽奇獸還奉高宮日重輪五色雲見作會真宮癸
丑御朝覲壇之壽昌殿受羣臣朝賀大赦天下常赦所
不原者咸赦除之文武官並進秩賜致仕官本品全奉
一季兩浙錢氏泉州陳氏近親蜀孟氏湖南馬氏荆南
高氏廣南河東劉氏子孫未食祿者聽叙用賜天下酺

三日泰山七里內禁樵採大宴穆清殿又宴近臣泰山父老於殿門賜父老時服茶帛十一月戊午如曲阜縣拜文宣王廟辛酉賜諸蕃使袍笏丁丑帝至自泰山奉天書還宮壬午詔以正月三日為天慶節甲申命王旦奉上太祖太宗謚冊親享太廟乙酉大宴含光殿十二月辛卯御乾元殿受尊號辛丑王旦加中書侍郎兼刑部尚書楚王元佐加太傅寧王元偓為護國軍節度使舒王元偁為平江鎮江軍節度使並兼侍中廣陵王元

儼進封榮王安定公惟吉為威德軍節度使餘進秩有
差癸卯如上清宮景德開寶寺詔天下宮觀陵廟名在
地志功及生民者並加崇飾契丹遣使來賀是歲西涼府
甘州三佛齊大食國西南蕃等來賀封禪諸路言歲稔
米斗七八錢

二年春正月癸亥以封禪慶成賜宗室輔臣襲衣金帶
器幣乙酉以陝西饑遣使巡撫二月壬辰詔立曲阜縣
孔子廟學舍甲辰蠲同華州民租戊申遣使祠太乙祀

玄冥癸丑禁毀金寶塑浮屠像甲寅以丁謂為三司使
三月丙辰日當食不見辛未賜京城酺夏四月己亥以
丁謂為修昭應宮使丁未振陝西民饑六月甲午如昭
應宮賜修宮使器幣罷邕宜州歲貢藥箭秋七月辛未
以昭應宮為玉清昭應宮乙亥蠲京東徐濟七州水災
田租九月戊午賜秦州被水民粟壬戌合鎮定部署為
一甲子命工部侍郎馮起使於遼乙丑如潛龍園宴射
丁丑振鳳州水災冬十月甲午詔天下置天慶觀十二

月辛丑丁謂上封禪朝覲祥瑞圖劉承珪上天書儀仗圖

三年春二月癸巳交州黎至忠卒大校李公蘊自稱留
後甲寅冬官正韓顯符上新造銅候儀戊辰降東京畿
內囚罪三月壬辰以李公蘊為靜海軍節度使封交趾
郡王夏六月庚戌邊臣言遼使來告糴詔雄州糴粟二
萬石振之河中府父老千餘人請祀后土不許丙辰頒
天下釋奠先聖廟儀并祭器圖秋七月丙申溫仲舒卒

辛丑文武官將校等三上表請祠汾陰后土八月丁未
詔明年春有事於汾陰戊申以陳堯叟為祀汾陰經度
制置使己酉王旦為祀汾陰大禮使王欽若為禮儀使
庚戌詔汾陰路禁弋獵不得侵占民田如東封之制辛
酉給還鄆州民牧馬草地甲子罷江淮和糴降所在囚
罪丁卯羣臣五表上尊號不許乙亥河中府父老二千
百人來迎帝勞問之賜以緡帛九月華州言父老二千
餘人請辛酉歲冬十月辛亥契丹使者來河中民言獲

靈寶真文庚申丁謂等上大中祥符封禪記十一月己亥如太乙宮陝州黃河清十二月陝州黃河再清庚戌集賢校理晏殊獻河清頌辛酉謁玉清昭應宮

四年春正月辛巳詔執事汾陰懈怠者罪勿原乙酉習祀后土儀丙申詔以六月六日天書再降日為天貺節丁酉奉天書發京師庚子次汜水陳堯叟獻白鹿二月戊申華州獻芝草東京獄空壬子遣近臣祠西嶽癸丑次河中府丁巳黃雲隨天書輦次寶鼎縣奉祇宮戊午

登後園延慶亭己未潘泉湧有光如燭辛酉祀后土地
祇是夜月重輪還奉祇宮紫氣四塞如開元寺作大寧
宮大赦天下常赦不原者咸赦除之文武官並遷秩賜
天下酺三日大宴羣臣於穆清殿賜父老酒食衣幣作
汾陰配饗銘河瀆四海贊乙丑觀酺加號西嶽壬申宴
魏州父老於湖城行宮三月甲戌次陝州召草澤魏野
辭疾不至乙亥賜運船卒時服己卯次西京庚辰罷河
北緣邊工役己丑御五鳳樓觀酺甲午發西京夏四月

甲辰朔駕至自汾陰丙辰大宴含光殿己未餞种放歸
終南甲子王旦加右僕射元佐為太尉元偓進封相王
丁卯許國公呂蒙正薨五月乙未加上五嶽帝號作奉
神述丁酉慮囚降死罪以下秋七月壬申除閩浙荆湖
廣南歲丁錢己丑詔先蠲濱棣州水災田租十之三今
所輸七分更除其半除畬田租庚戌曲宴諸王宰相癸
丑賜青州孤老惇獨民帛丁巳詔文武官有言刑政得
失邊防機事者並賜對乙丑刻御製大中祥符頌於大

承天祥符門九月丁丑涇原鈐轄曹瑋言籠竿川熟戶
蕃部以閒田輸官請於要害地募兵以居許之戊子如
太乙宮祈晴辛卯以向敏中等為五嶽奉冊使癸巳御
乾元殿發五嶽冊丁巳定江淮鹽酒價

五年春二月丙寅詔官吏安撫濱棣州被水民三月庚
戌王旦等並加特進功臣丁未免濱棣民物入城市者
稅一年夏四月戊申以向敏中為平章事壬子除通泰
楚州鹽亭戶積負丁額課鹽五月丁亥免棣州民租十

之三六月癸亥賜邵武軍被水者錢粟秋八月丙申朔
日有食之戊戌張齊賢以司空致仕己未作五嶽觀九
月戊子以王欽若陳堯叟並為樞密使同平章事丁謂
為戶部侍郎參知政事冬十月戊午帝於延恩殿道場
親瞻九天司命天尊降己未大赦賜致仕官全奉閏月
己巳上聖祖尊號辛未告謝太廟壬申立先天降聖節
乙亥詔上聖祖母懿號加太廟六室尊謚丙子羣臣上
尊號曰崇文廣武感天尊道應真佑德上聖欽明仁孝

皇帝戊寅建景靈宮太極觀於壽邱辛巳建安軍鑄聖
像龍見雲中戊子御製配享樂章并二舞名文曰發祥
流慶武曰降真觀德十一月丙申親祀玉皇於朝元殿
甲辰加王旦門下侍郎向敏中中書侍郎楚王元佐太
師相王元偓太傅舒王元偁太保文武官加恩有差置
玉清昭應宮使以王旦為之丁未作汴水發願文乙卯
罷獻珍禽異獸十二月甲子置景福殿使戊辰作景靈
宮己卯知天雄軍寇準奏獄空乙酉振泗州饑丙戌詔

天慶等節日民犯罪情輕者釋之丁亥立德妃劉氏為皇后

六年春正月癸巳朔上御朝元殿受朝司天監言五星同色戊申禁內臣出使預民政己酉賜京師酺五日二月戊辰觀酺己亥泰州言海陵草中生聖米可濟飢三月乙卯建安軍鑄玉皇聖祖太祖太宗尊像成以丁謂為迎奉使夏五月丙午詔聖像所經降囚罪流以下釋之乙卯謁聖像奉安於玉清宮丁巳遣使奉告諸陵六

月丁卯壽州獻紫莖金芝秋七月癸巳上清宮道場獲
龍於香合中癸卯詔天下勿稅農器己酉亳州官吏父
老三千三百人詣闕請謁太清宮八月庚申詔於來春
親謁亳州太清宮辛酉以丁謂為奉祀經度制置使丙
寅禁太清宮五里內樵採庚午加號太上老君混元上
德皇帝置禮儀院冬十月甲子亳州太清宮枯檜再生
真源縣菽麥再實癸酉謁玉清昭應宮十一月甲寅判
亳州丁謂獻芝草三萬七千本十二月戊午朔日有食

之庚申涇原鈐轄曹瑋發兵討原州界撥藏族破之已
巳天書扶侍使趙安仁等上奉天書車輅鼓吹儀仗壬
申獻天書於朝元殿遂告玉清昭應宮及太廟乙亥如
開寶寺上清宮己卯如太乙宮

七年春正月辛丑慮囚壬寅車駕奉天書發京師丙午
次奉元宮判亳州丁謂獻白鹿一芝九萬五千本戊申
王旦上混元上德皇帝冊寶己酉朝謁太清宮是夜月
重輪曲赦亳州及車駕所經流以下罪減亳州歲賦十

之二改奉元宮為明道宮太史言含譽星見庚戌御均
慶樓賜酺三日壬子詔所過頓遞侵民田者給復二年
丙辰赦南京境內及京畿車駕所過流以下罪二月庚
申夏州趙德明遣使詣行闕朝貢辛酉至自亳州丙寅
詔天地壇非執事輒臨者斬辛未饗太廟壬申恭謝天
地大赦甲午加宰相王旦向敏中楚王元佐相王元偓
舒王元偁榮王元儼樞密使同平章事乙未宴翔鸞閣
辛丑振儀州饑夏四月己未賜淮南諸州民租十之二

癸亥河南府獄空有鳩巢其戶生二雛甲子以歸義軍
留後曹賢順為歸義軍節度使丙子舒王元偁薨五月
壬辰以王旦為兗州景靈宮朝修使乙未又為天書刻
玉使涇原言葉施族大首領艷般率族歸順六月乙亥
樞密使王欽若罷為吏部尚書陳堯叟為戶部尚書以
寇準為樞密使同平章事丙子復棣州歸業民租三歲
秋七月甲辰以同州觀察使王嗣宗內客省使曹利用
並為樞密副使八月甲寅置景靈宮使以向敏中為之

乙卯除江淮兩浙被災民租九月丙戌含譽星再見辛卯尊上玉皇聖號曰太上開元執符御曆含真體道玉皇大天帝冬十一月乙酉玉清昭應宮成減諸路囚罪己丑加王旦司空修宮使壬辰御乾元門觀酺十二月癸丑朔日當食不虧己未作元符觀辛酉加楚王元佐尚書令相王元偓太尉榮王元儼兼中書令忠武軍節度使魏咸信同平章事餘並進秩是歲夏州西涼府高麗女真來貢淮南江浙饑除其租天下戶九百五萬五

千七百二十九口二千一百九十七萬六千九百六十

五

八年春正月壬午朔謁玉清昭應宮奉表告尊上玉皇
大天帝聖號奉安天書於寶符閣還御崇德殿受賀大
赦除十惡枉法贓及已殺人者咸除之文武官滿三歲
者有司考課以聞乙未皇女入道夏四月壬戌以寇準
為武勝軍節度使同平章事王欽若陳堯叟並為樞密
使同平章事癸酉詔求直言五月壬午榮王元儼罷武

信軍節度使降封端王庚子放宮人一百八十四人六月己酉朔日有食之閏月己卯大赦天下七月戊午以王嗣宗為大同軍節度使丙子如瑞聖園觀稼宴射於水心殿冬十月乙巳王欽若上聖祖先天紀十一月辛酉相王元偓加兼中書令端王元儼進封彭王癸亥高麗使同東女真來貢十二月丁亥侍禁楊承吉使西蕃還以地理圖進

九年春正月丙辰置會靈觀使以丁謂為之三月辛酉

以西蕃宗哥族李立遵為保順軍節度使夏四月庚辰周伯星見丙申賜天下酺振延州蕃族饑五月乙巳夏人寇慶州內屬蕃部擊走之乙卯毛尸等三族蕃官馮移埋率屬來歸丙辰降天下囚罪丁巳以向敏中為宮觀慶成使六月戊寅如會靈觀宴祝禧殿秋七月丁未增築京師新城八月壬申知秦州曹瑋言伏羌砦蕃部廝難波與宗哥族為亂以兵誅平之丙戌製玉皇聖號文以陳堯叟為右僕射九月甲辰以丁謂為平江軍節

度使丙午陳彭年王曾張知白並參知政事宗哥嘉勒斯

賚蕃部馬波叱臘魚角蟬等寇羌伏砦曹瑋擊敗之

宋史

曹瑋上衍丁謂二字今刪

戊午禁諸路貢瑞物冬十月己卯王欽若

表上翊聖保德真君傳十一月會靈觀甘露降丁未河

西節度使石普坐妄言災異除名流賀州

天禧元年春正月辛丑朔改元謁玉清昭應宮上玉皇

大帝寶冊壬寅上聖祖寶冊己酉上太廟謚冊庚戌

享六室辛亥謝天地於南郊大赦受冊號乙卯宰相讀

天書於天安殿遂如玉清昭應宮作欽承寶訓述示羣臣壬戌詔以四月旦日為天祥節丙寅命王旦為兗州太極觀奉上册寶使二月壬申御正陽門觀酺戊寅加王旦太保中書侍郎平章事向敏中吏部尚書楚王元佐領雍州牧相王元偓加尚書令兼中書令進封徐王彭王元儼加太保壽春王禎兼中書令王欽若加右僕射趙德明加太傅中外官加恩有差夏四月庚辰陳堯叟卒五月戊戌詔所在安卹流民戊申以王旦為太尉

侍中五日一入中書旦辭不拜六月壬申降西京囚罪
流以下釋之父老年八十者賜茶帛除其課役戊寅除
昇州後湖租錢聽民溉田乙酉免大食國蕃客稅之半
秋八月庚午以王欽若為左僕射兼中書侍郎平章事
壬申向敏中加右僕射兼門下侍郎丙子詔京城禁圍
草地聽民耕牧戊寅免牛稅一年九月癸卯以參知政
事王曾為禮部侍郎李迪為參知政事馬知節知樞密
院事曹利用任中正周起並為知樞密院事己酉王旦

薨丁未教衛士騎射冬十月壬申諭諸州非時災沴不以聞者論罪己卯罷京東上貢物十一月壬寅詔淮浙荆湖治放生池禁漁採壬戌契丹使來賀承天節十二月乙亥罷京城工役丁丑放逋負釋繫囚辛卯詔陝西緣邊鬻穀者勿算壬辰遣使緣汴河收瘞流尸

二年春正月乙未真遊殿芝草生壬寅振河北京東饑戊午王欽若上天禧大禮記己未遣使諭京東官吏安撫饑民二月丁卯壽春王禎加太保進封昇王庚辰振

京西饑三月丙辰先貸貧民糧種止勿收夏四月庚寅
降天下死罪一等流以下釋之閏月癸卯以馬知節為
彰德軍留後丁未靈泉出京師作祥源觀秋七月壬申
以星變降天下流以下罪左降官羈管十年以上者放
還京師八月甲辰立子昇王為皇太子大赦宗室加恩
羣臣賜勛一轉壬子彭王元儼進封通王九月庚辰御
乾元門觀酺冬十月庚子召近臣觀刈占城稻遂宴安
福殿十二月辛丑以張旻為武寧節度使同平章事

三年春三月戊午朔日有食之夏五月辛未慮囚六月
癸未浚淮南漕渠廢三堰戊戌以寇準為中書侍郎兼
吏部尚書平章事丁謂為吏部尚書參知政事秋七月
壬申曹璨卒羣臣上尊號曰體元御極感天尊道應真
寶運文德武功上聖欽明仁孝皇帝八月丁亥大赦已
亥慶州亡去熟戶委乞等來歸庚戌遣使卹京東西河
北水災九月乙丑慶州骨咩大門等族內附冬十一月
己巳謁景靈宮庚午饗太廟辛未祀天地於園丘大赦

丁丑御天安殿受尊號冊十二月丙戌富州蠻酋向光澤表納土詔却之辛卯向敏中加左僕射中書侍郎兼禮部尚書平章事寇準加右僕射通王元儼進封涇王曹利用丁謂並為樞密使百官加恩有差癸巳以任中正周起並為樞密副使

四年春正月乙丑以華州觀察使曹瑋為鎮國軍留後
僉樞密院事丙寅開揚州運河己巳如元符觀二月帝
不豫癸未遣使安撫淮南江浙利州饑民辛丑發唐鄧

八州常平倉振貧民三月戊午貸淄州民牛糧甲子振
蕃部粟己亥振益梓饑己卯向敏中薨夏五月丁巳發
粟振秦隴六月丙申以寇準為太子太傅萊國公秋七
月丙寅以李迪為吏部侍郎兼太子少傅平章事馮拯
為樞密使吏部尚書同平章事庚午以丁謂為平章事
曹利用同平章事癸酉入內副都知周懷政伏誅丁丑
太子太傅寇準降授太常卿翰林學士盛度樞密直學
士王曙並罷職八月永興軍都巡檢使朱能殺中使以

叛乙酉以任中正王曾並參知政事詔利夔路置常平
倉丙戌朱能自殺壬寅貶寇準為道州司馬九月丁卯
赦天下己巳遣使安撫永興軍壬戌賜京城酺冬十月
壬午御正陽門觀酺壬辰以王欽若為資政殿大學士
甲辰減水災州縣秋租丙午召皇子宗室近臣玉宸殿
觀稻十一月丙寅丁謂加門下侍郎兼太子太傅李迪
加中書侍郎兼尚書左丞依前少傅戊辰罷謂為戶部
尚書迪為戶部侍郎任中正王曾錢惟演並兼太子賓

客張士遜林特並兼太子詹事晏殊為太子左庶子已
已詔謂赴中書視事如故甲午詔自今除軍國大事皆
委皇太子同宰相樞密使等參議行之以丁謂兼太子
少師馮拯兼少傅曹利用兼少保辛未詔自今羣臣於
長春殿起居餘隻日視朝於承明殿十二月乙酉皇太
子親政詔內臣傳旨須覆奏己丑王欽若加司空丁酉
以王欽若為山南東道節度使同平章事

五年春正月癸巳降天下死罪流以下釋之乙未遣使

撫京東水災丁酉以張士遜為樞密副使己亥宴近臣
於承明殿二月甲寅審刑院言天下無斷獄丙寅賜天
下酺庚午以孔子四十七世孫聖祐襲封文宣公三月
辛巳御正陽門觀酺辛丑以京東西水災賜民租十之
五壬寅加丁謂司空馮拯左僕射曹利用右僕射任中
正工部尚書夏五月乙亥慮囚降天下死罪秋七月甲
戌朔日有食之戊寅新作景靈宮萬壽殿九月戊寅嘉
勅斯賚請降冬十月癸卯蠲京東西淮浙被災民租壬子

依漢唐故事五日一受朝遇慶會皇太子押班十一月
戊子山南東道節度使王欽若擅赴闕降司農卿分司
南京

乾興元年春正月辛未朔改元丁亥御東華門觀燈戊
戌蠲秀州水災民租二月庚子大赦癸卯羣臣上尊號
曰應天尊道欽明仁孝皇帝振蘇湖秀州饑甲辰封丁
謂晉國公馮拯魏國公曹利用韓國公庾辰振徐州貧
民甲寅召對宰相於寢殿戊午帝大漸遺詔皇太子於

樞前即位尊皇后為皇太后權處分軍國事淑妃為皇太妃是日皇帝崩於延慶殿年五十五謚曰文明武定章聖元孝皇帝加謚膺符稽古神功讓德文明武定章聖元孝皇帝廟號真宗陵曰永定陵

真宗咸平六年景德四年大中祥符九年天禧五年
乾興一年凡二十五年

欽定續通志卷二十七